

Augsburg, 13. August 1578

An Bonaventura Vulcanius

UB Leiden VUL 105:3, Nr.4.

Doctissimo humanissimoque viro, D. Bonauenturae Vulcanio etc. amico suo colendo.  
 S. Ignarus ubi locorum degeres, quid rerum gereres, 23 Maij ad te dedi literas, quas an acceperis, dubito. Nam tabellarij fides, ad me non reuersi, mihi suspecta est. Et diuturnum silentium tuum nos solicitat. Quam solicitudinem, ut breui epistolio nobis adimas, rogamus. Nam quo minus editus hactenus sit Cyrillus, non per te, sed per typographos stetisse, satis scimus. De Iulio item Polluce quid fiat, certiores nos reddas velim. Est is olim à Rudolpho Walthero Tigurino versus: cuius interpretationem (nisi tibi meliorem substituere visum fuerit) Graecis è regione opponi, consultum iudicarem. D. Io[annes] Bap[tista] Hainzelius et ego nullam nec inuenire potuimus hactenus occasionem, qua sine tuo sumptu Italiam videres: nec, afflictis mercatorum nostratum rebus, ullam prospicimus. Quare voluntatem nostram amabis, fortunae veniam dabis. D. item Hainzelius petit, ut codices manu scriptos (quando ijs iam utique uti desieris) quamprimum sartos tectos huc remittendos cures. Appellatur enim, ut sponsor, à summo bibliothecae nostraræ praefecto, cuius ego tantum minister sum. Augustae, Idibus Augusti, natali meo tertio et sexagesimo, quem annum, διὰ τὸν διπλοῦν κλιμακτῆρα, τὸν τε ἑβδοματικὸν, καὶ τὸν ἐννεατικὸν, ἀνδροδάμαντα καλοῦσιν οἱ τῶν ἀστρολόγων παιδες. Anno 1578.

Hiero[nymus] Wolfius  
 οὐ λέων, ἀλλὰ λύκος,  
 προβάτου ἡπιώτερος,  
 tuique studiosissimus.